

## Zum Aufführungsrecht

- Das Recht zur Aufführung erteilt der **teaterverlag elgg**, CH-3123 Belp  
Tel. + 41 (0)31 819 42 09. Fax + 41 (0)31 819 89 21  
[www.theaterverlage.ch](http://www.theaterverlage.ch) / [information@theaterverlage.ch](mailto:information@theaterverlage.ch)  
Öffnungszeiten:  
Montag - Freitag von 09.00 bis 11.30 Uhr & 13.30 bis 17.00 Uhr
- Der Bezug der nötigen Texthefte - Anzahl Rollen plus 1 - berechtigt nicht zur Aufführung.
- Es sind darüber hinaus angemessene Tantièmen zu bezahlen.
- Mit dem Verlag ist *vor den Aufführungen* ein Aufführungsvertrag abzuschliessen, der festhält, wo, wann, wie oft und zu welchen Bedingungen dieses Stück gespielt werden darf.
- Auch die Aufführung einzelner Teile aus diesem Textheft ist tantièmenpflichtig und bedarf einer Bewilligung durch den Verlag.
- Bei eventuellen Gastspielen mit diesem Stück, hat die *aufführende Spielgruppe* die Tantième zu bezahlen.
- Das Abschreiben oder Kopieren dieses Spieltextes - auch auszugsweise - ist nicht gestattet (dies gilt auch für Computerdateien).
- Übertragungen in andere Mundarten oder von der Schriftsprache in die Mundart sind nur mit der Erlaubnis von Verlag und Verfasser gestattet.
- Dieser Text ist nach dem Urheberrechtsgesetz vom 1. Juli 1993 geschützt. Widerhandlungen gegen die urheberrechtlichen Bestimmungen sind strafbar.
- Für Schulen gelten besondere Bestimmungen.

*"Es gibt Leute, die ein Theaterstück als etwas "Gegebenes" hinnehmen, ohne zu bedenken, dass es erst in einem Hirn erdacht, von einer Hand geschrieben werden musste."*

Rudolf Joho



teaterverlag elgg

# Dr Sudu

Ein Versuch für mindestens 4 Schauspieler

von

Beat Sterchi

Die Reihenfolge der Texte ist nicht endgültig festgelegt. Schluss fehlt

## A + B

hesch d fäueli gsteut?  
iu  
au?/  
ja / klar / werum?  
eifach  
was isch de?  
nüt  
werum machsch de wider a sure gring?  
i mache ke sure gring  
mou / du machsch a griesgrämige sure gring!  
isch nid wahr!  
wenn ders säge  
jtz gan i grad säuber ga luege  
gang lueg nume i spiegu  
iu du / du hesch rächt / i mache würklech e sure gring  
gäu  
dä gring  
dyne  
iu  
wei mer gah?  
wohäre?  
äbe / furt  
jtz scho?  
we doch scho haubi isch  
scho  
chum göh mer / dr streife fat äm haubi a  
aber we de nid wosch muesch nid / auso nid wäge mir  
i ha doch gseit i wöui  
ja scho / gseit hesch es / aber i merke doch  
was merksch jtz wider?  
gäu äs stinkter?

was? auso gäu / jtz wird i de grad verrückt / da erkläre  
dr läng u breit i wöui mitcho u i fröii mi u de chunsch du  
u seisch i wöui gar nid  
so gsehsch ömu us  
auso chum / we jtz nid usfhörsch / de han i grad ke luscht  
me  
gsesch / i has ja gseit du wöisch nid mitcho  
jtz gopferdami hure siech  
wosch o no ä schluck?  
iu / .... / hesch mer äs für?  
weisch was?  
ähä  
i ha hunger / du o?  
iu / i o / villech wäge däm / dr gring  
wei mer öppis ga ässe / zum italiener?  
i cha o öppis choche  
i ha ds gfieu / us geit viu kaput im chüeuschrack  
i ga grad ga luege  
isch no viu da  
morn mues i dä sowieso usrumen / weisch / ganz  
aber mir chöi o öppis ga ässe / i ha nume kener stütz  
je i choche öppis / nume no die zigi  
spaghetti hets sicher no  
i ga grad ga luege / u morn rumen i dr chüeuschrack us  
abtoqe sött me ne ja o  
gisch mer no ne schluck?  
mir chöi o zum italiener / i gib dirz zrügg  
i cha scho öppis choche / mir hei no viu züg  
oder söu i?  
chum / göh mer doch schnäu zum italiener  
los / villech  
wosch no?  
villech sötte mer / sötte mer eifach  
öb o no wöusch?

ig ha wöue säge / villech sötte mer / sötte mer eifach  
mau mit ne rede  
mit ne schnurre? / no meh?  
he ja / oder / villech / i säge ja nume  
se öppe no ylade / hie ufe?  
si si doch  
lase / chum lase / die chöi äuä no angers / spinnsch  
aber / we du mau würdsch  
i säg drs / äs het ke wärt / u überhaupt / wede scho vom  
rede redsch / mit dir / mit dir wett i mau  
i rede nid vom rede / i ha nume gseit  
mir sötte mit ne rede  
aber i wett mit dir rede / mit dene / mit dene han ig  
nämlech nüt meh ds rede / auso / wo wosch jtz häre

....

mir sötte mau ds grächtem  
aber churz  
los / äs isch eifach / was isch jtz?  
wenn i uf en abe muess / aber was isch de / sägs doch  
de gang doch uf en abe  
wenn i muess  
de gang doch  
jtz chum  
gäng we me mit dir wott rede muesch du uf en abe / de  
gang doch / gang doch ga schysse

## C + D

u jtz / he? / han is nid gseit? / hesch jtz gseh?  
jtz mach nid so nes züg  
han is nid gseit he? / han is nid gseh cho? / aber wär lost  
uf mi / he? / uf an aut lost niemer / aber heiters jtz gseh /  
he? / hesch jtz gseh wi si si? / wi si würklech si?  
wi si si?  
ja wi si si / das si so si wi si si  
auso / auso  
si si / si si so oder si si / si si nid so?  
auso / weisch  
si si so oder si si nid so?!

du bisch eifach nid  
die si so!  
nei jtz  
äbe si si so!  
we si....  
wi si si de / he / wi si si de / we si nid si wi si si?  
si si haut / si si haut / oder si si no jung  
frächi cheibe sis / nüt aus erger u täubi / .... / nüt aus  
tūfusdank / nie äs aschtändigs wort  
jtz hör mer uf / i bitte di  
i muess sowise ga  
äbe du muesch ga  
wenn i doch / wenn i doch muess rede morn  
äbe  
üebe muessi dänk o / oder  
äbe

## C

sones / sones gstürm / wäg so eire / sonere zuecheglüfne  
/ so eine / wo nüt het / wo nüt isch u nüt cha / wäg so  
eire / söttet die gseh / öppis i d finger näh / vo drüne /  
drüne gläser si jedesmau zwöi kaput / tätsch / abe / u  
immer mit dr cigarette dinn / he ja / oder / we si / we si  
de scho mau hiuft / u wi si de / wi si de blinzlet mit den  
ouge / wägem rouch / die / auso / aus was rächt isch / u  
mit mir nid / das de scho gar nid / auso nid / nid / dass i  
de nid o scho dänkt hät / ja oder / gäng cha me ja nid /  
de muess me haut / auso i cha scho nagäh / oder / villech  
besserets de / si isch ja no / no jung / me weiss ja nid /  
we me mau äs oug zuedrückt / si wird ja äuter / de giben  
i öppe nah / aber i wott nid / i wott eifach nid immer /  
auso jtz wott ig eifach nüm gäng nahgä / jtz  
himuhergottdonner / wenn is doch weiss / wenn i doch  
weiss / dass äs äso isch / wenn i doch / i weiss doch /  
dass i rächt ha / dass i rächt ha

## C + D

aber är  
är wär gwüss a guete  
gäu / a gäbige  
ganz a gäbige / u ne gschickte  
a liebe  
u ja  
so ne liebe  
nätt / weisch / nätt u fründlech  
zu mir o  
eigentlech mit aune  
är chunnt eifach guet us mit de lüt  
wüeu er o ne luschtige isch

cha dä witze mache  
gäu, dä weiss gäng eine  
drum hei ne d ching o so gärn  
är het haut zyt  
u geduld  
wüeu är se gärn het  
ja är isch scho ne guete  
nid so ne griesgrämige  
gäu / ke rüpu  
wo nie zyt het  
immer numme a tummi  
är isch kene vo dene  
vo dene vagante  
wo nid wei chrampfe / immer nume a sure gring mache  
aus i dräck zie  
die unpflegte souhung  
die fräche heilandsdonner  
wär het jtz / auso / wo isch jtz das züg härecho / hesch  
du mer.....?  
was suechs?  
wo si miner bletter?  
was?  
mi sudu  
wele sudu?  
dr sudu / won i ha gmacht  
du hesch ä sudu gmacht?  
natürlech han i ä sudu gmacht / i muess doch rede morn  
/ i mache immer ä sudu

## B + D

i gibe ders ja zrügg  
aber är schaffet doch jtz de / jtz de wider  
wenn is doch jtz bruche / jtz / versteisch / hüt  
was hocksch jtz i vater si stueu?

.....  
du weisch dänk / das isch em vater si stueu  
gopf / auso / är isch doch gar nid da  
jtz gisch no use  
auso gopfridstutz!  
wosch du äch so guet si  
auso würklech / du / geits eigetlech no / spinnen i oder  
was / wäge dene paar stütz / blaset dir mir i d schue / i  
ha gnue / frässet ne haut / öie chlüder zum zmorge  
aber jtz los doch / wart doch / jtz los doch mau uf üs wo  
wosch jtz häre / mir wette doch / mir si doch / tüe mer  
de nid / mir si doch vo hie / si mir de nid / mir wette  
doch nume / nume / häufe

## A + B

bisch scho wider zrügg?  
iu  
u de?  
was äch  
hesch eres / hesch eres jtz / jtz gseit?  
dru los  
hesch eres / hesch eres nid....  
los / auso  
nid?  
auso / säg doch / säg doch du re / du re das  
aber  
werum ig?

aber / mir hei doch  
jtz chum  
mir hei doch / du weisch doch / oh / auso  
was hätt i re de söue säge / was?  
.....  
dere chame doch gar nüt / die lost doch nid zue / auso  
würklech / was wosch eigentlech no?  
auso / du hätsch ere / hätsch ere doch jtz chönne / hätsch  
ere / hätsch ere doch eifach  
hätsch ere doch du  
äs geit doch nid drum wär / du bisch doch jtz....  
um was geits de? / he / sägs / um was geits de?  
äs geit äbe drum / dass es dir im prinzip schysseglych  
isch / dir isch aus schysseglych / du weisch gar nüm /  
dass es würklech um öppis geit / aber das geit dir nid i  
gring / du hesch überhoupt kes gfieu fur d würklechkeit  
meh  
u das hesch du / he / im gägesatz zu mir / du hesch das /  
wär geit de hie eigentlech uf a bügu? / hesch du i dr  
letschte zyt mau chöle heibracht? / he? / we scho vo  
würklechkeit wosch rede  
i säge ja gar nid das igs heig / aber i wett wenigstens / ja  
i chöront mer vorsteue  
driüber schnurre he? mit dere schnurren i nüm / u mit  
ihm e grad nid / u überhoupt hätsch chönne abwäsche /  
wenn ig dé scho jede tag uf a bügu ga / auso / isch doch  
wahr  
äs geit doch jtz nid um die paar Kaffeetassli  
äbe geits um das  
jtz reduziersch wider aus uf das blöde gschir  
dert gseht mes äbe  
ja sicher grad bi de taffeekassli / eh kaffeetassli

aber wes würklech druf a chäm / du muesch natürlech o  
gseh / oder / dass das nid eifach ohni witors so mir nüt  
dir nüt vo eim tag uf en anger problemlos chönnt  
dürezoge wärde / oder / du chönntsche doch zum bispiu /  
i meine nume versuechswys / müesstisch di no gar nid  
festlege / ja oder / äs isch nume ne vorschlag /  
müesstisch dr eifach d konsequänz überlege / oder /  
eifach di position no mau überdänke / weisch / objektiv  
gseh oder / wüeu wes de druf a chäm / de müesstisch du  
ja schliesslech u ändlech o mau igseh  
jtz gottverdammi / geits no / wär geit hie eigentlech uf à  
bügu? he?

## C + D

we du nume / we de nume mau öppis siegtisch

....  
isch ömu wahr

....  
was suechsch de o? du chönntsche ere doch / chönntsche  
ere ömu sauft mau / was schnaggisch jtz du unger dä  
tisch? / chönntsche ere doch / ghörsch? / chönntsche ere  
doch / sägere doch mau / äs wär doch  
jtz han is  
was?

nüt / was i ha gsuecht / äs isch mer abegheit  
was / das gummeli?

das isch dänk vo mim sudu / vo de bletter / oder  
aber glych / chönntsche ere doch mau  
was? / was? / was söu ere säge? / was?

äbe / dass si o sött

we si nid wott / kennsch se ja / hesch nid gseh / he / wi  
si wider isch agleit gsy / an allegi! / so eini / was aus a  
dere hanget / aber vo zungersch bis zobersch  
jtz tuesch wider wüescht / aber säge nüt

: isch ömu wahr / die chlefelet afe wie ne glöggelichumet /  
we si mau äs schritteli macht / mängs cha si ja nid / i  
dene änge schüpli  
jetz red doch nid / auso / u nächär  
wi si de vo irne höche absätz abeluegt / wie ne mischig  
zwüsche nemne läbchueche u ämene lötchoube / das  
gschmier am gring / u die verschlargete chlöpe / wo si  
für nüt cha bruche  
we du nume chasch das meitschi schlächt mache  
isch doch wahr / lue se doch / u wär zaut das / he?  
auso gäu / äs schaffet doch / äs git doch no ihm gäut  
he / das wett i de gseh  
du  
he?  
gäu du / gäu du weisch es?  
was?  
äbe  
han i vori nid grad / han i vori nid gseit  
was seisch?  
ig?  
wär äch / wär äch süsch / we nid du?  
ig? i säge nümme  
gesesch! / de lis haut zitig  
mir längts  
du chönntsch auso würklech mau öppis / öppis säge  
säg doch du mau öppis  
i säge dänk geng öppis  
äbe seisch nie nüt  
du ömu o nid  
jtz han i ömu / han i ömu grad öppis gseit  
äbe nid  
i ha doch gseit / du söusch öppis / öppis säge  
äbe / i söu öppis säge / du seisch immer nume / i söu  
öppis säge  
u de / u de du? / he?

was „ u de du?“ / du söusch mau öppis säge  
äbe / derbi han i doch öppis gseit  
jä was jtz?  
mou  
was de?  
chum / höre mer uf / lis du zitig  
eigetlech si mer is ja einig  
ja / gwüss  
mou  
du seisch mer immer nume / nume immer aus nache  
u de du mir?  
de sägs doch  
was?  
was si dr het gseit / was si jtz wei mache?  
aber i ha doch vori / han i vori nid gseit  
äbe nid  
.....  
ömu nid aus  
auso we du nume chasch / immer ds glyche / auso  
du gäu  
isch ömu wahr  
we du nüt seisch  
äs muess doch nid gäng immer aus gseit si  
du wosch mers nume nid säge  
ganz genau  
u wägerum / wägerum / he? / wägerum nid?  
wüens ja glych scho weisch  
wenn i aber ha gseit  
äs bringt glych nüt  
auso i darf nid mau wüsse  
versteisch de nid / das änderet eifach nüt / gredt isch  
schnäu viu / u ghuefe isch ne glych nid  
jtz?

## C

wüsster oder / grad bi de chleider / die schale da / die  
han ig o no gar nid so lang / was sy das? / zwöi drü jahr  
/ nei mängi settigi han i mer fruecher o nid chönne  
leischte / oder / mit de schueh isch es ds glyche aber me  
cha doch glych öppe aschtändig dasume loufe / oder /  
süscht lueget oder / ig wet doch gar nid behoupte / ig wet  
hüt wider vo vorne afa / sisch angers / wüsster / ig wet  
nume säge / gopfridstutz / äs chunnt doch eifach nid äso  
druf a / was me macht / oder / kunscht isch doch die  
sach azpacke / si ma ds steue / vo nüt chunnt nüt u we  
eine wott / de chan ers doch zu öppis bringe / o hüt no /  
oder

## C + D

jtz schlücksch aber he? / aber da chasch lang tum luege /  
u weisch was?  
was jtz no?  
eis wiu dr säge / ire han is o scho gseit / ja, gseit / han i  
res  
wäm?  
dere  
äuä  
mou / i ha res / i ha res gseit  
dütsch u dütlech?  
dütsch u dütlech!  
jäh  
momou / das chasch mer gloube  
jäh chum

a schand isch das / nid zum derby sy / einisch isch  
gopfridstutz gnue, oder / me muess sech doch nid aus la  
gfaue / für was symer de häre gstange, he? für was, he?  
weisch nüm?  
jtz mach mer doch nid o no angscht  
de heb haut d ohre zue / steck di gring i bode  
auso grad äso schlimm wie du  
jtz gloub mers doch ändlech / mach d ougen uf  
äs isch drum / i weiss nid  
zum dervoseckle isch es  
jäh, meinsch de nid / oder / villech / villech  
steckgring  
äs isch haut / lue / du muesch/ sött me nid...?  
hör mer uf du / hör mer / hör mer uf / i ha gnue gseh bis  
hie han is / im schlüssu hocke u grossi i gring hingere  
drücke / äso geit das jtz eifach nüm wyter / iu, grossi i  
gring hingere drücke, roucke u tumm schnurre, oder? /  
aber jtz längts / einisch isch schluss u fertig / gopfrid-  
stutz / isch ömu wahr / nüt aus grossi i gring hingere  
drücke  
jtz tue du o no so  
i tue nid äso  
mou / du tuesch äso  
i tue nid äso / nüt aus grossi i gring hingere drücke u du  
tuesch wi we di aus nüt agieng.  
u du, he? / u du?  
isch ömu wahr  
i lyde doch o  
wäs? / du lydisch?  
ömu so viu wi du /..../ we nid me  
jtz hör mer aber uf  
de gloubs haut nid  
nüt aus im schlüssu hocke u grossi i gring hingere  
drücke

## C + X Coiffeur (?)

: so / merci / dankeschön / ja / merci / jtz no dr äcke putze  
/ oder hie o?  
: eh eifach / dass suber isch  
: guet / merci / so? / öppe oder?  
: ja nämets nume mutz  
: mutz? / gärn  
: äs isch eim doch grad ume wöhler  
: u dir/ ganz sicher / i säges o gäng / ä subere äcke dir/ so  
ne subere äcke / oder nid? / u grad dr äcke  
grad dr äcke  
u früscht rasiert  
äbe  
aber dir müesset ja schints / morn  
äbe ja  
das isch de haut / we eine muess rede  
ja gäuet / eine muess haut  
we kene wott  
äbe / das isch es  
u de no aus presidänt  
jä eine muess / we niemer me wott / äs wott eifach kene  
me füre / aber gar a kene  
aber eine muess  
äbe.  
u dr sohn? / dä gseht me o nüme  
jä däm geits guet  
är isch dänk o furt  
eh die si i mene loschii / ds wabere usse  
so / ds wabere  
wär so guet / merci / dankeschön / oder söu i das grad  
no näh? / guet merci  
mo mou / jtz macht das wider a gattig  
gäuet

## C

wüsster / äs isch mer scho wägen ihm / wüsster wägen  
ihm säuber / äs isch drum / oder / äs züg mit dene /  
gfragt han i ne ja scho / oder / bevor si hei gmeint si  
müesste jtz umdsverrecke hürrote oder / was sys für lüt /  
han i ne gfrag / ds gäut / wo hei si das? / numme so i dr  
blute füdletäschre oder längts für nes aschtändigs  
portemonnaie / wüsster oder / nid das si müesste d  
hunderter-nötli i zwänzgerbigeli us dr chutte zieh / aber  
mi gseht doch sofort oder i welere stube me öppé ä  
kommodeschublade dörft uftue ohni das me müesst  
erchlüpfe / wüsster / i bi nid äso / aber öppé nes schöns  
portemonnaie oder / das seit scho viu / nid das äs nume  
äm gäut würd fähle / das wetti scho nid behoupte oder /  
aber wüsster me merkts scho / oder

## A + B

wosch würklech / nei / wosch würklech öppis choche? /  
das wär de tschent / weisch wie / ou du / hesch du das  
gseh? / .... / lue man das / läck dä späck! / auso / i gloube  
du ig ga uf diät / bi ig dick / was gugglisch jtz? / bisch  
jtz a schadefreudige siech / aber eis cha dr auso flüstere  
/ jtz luegen de nüm i spiegu / ä ä du / aber wosch  
würklech öppis choche? / hesch du gseh / win ig ha  
zuegnoh? / was gugglisch de o? / tuesch nid eklig /  
lachschi mi us? / du bisch jtz an aff / wo bisch de o? /  
was würdsch de choche? / he? / säg / he!  
i weiss o nid / öppis  
aber was? / ig isse sowiso nüt  
eh / i wäsche schnäu ds gschir ab / nächär luegen i de  
äsh het de nüme  
i luege de / im chüeuschranc  
auso i wott nüt / aber abtoue sött me ne de

villech an omelette  
was? / omelette? / mit schinke?  
i luege de  
auso i ga uf diät  
u öppen no pudding  
was? pudding o?  
wes no gnue miuch het  
i wott sowiso nüt / vo jtz a du / vo jtz a nimm i ab / aber  
sicher du / vo jtz a du / vo jtz a chasch diner omelette  
säuber frässe  
u weisch was / du? / weisch was mir d regine hüt het  
verzeut? / äs gheimnis / chunnsch druf? / i wasche de  
nächär fertig ab / darfsch drü mau rate / wo si miner  
sesch?  
si het dänk e näie  
ää  
de isch si schwanger  
iu du / aber d regine du! / u im vierte monet / aber säg  
nüt / he / das i drs gseit ha  
das gseht me doch scho fasch  
nüt / i ha überhaupt nüt gmerkt / u grad bi ihre / si du! /  
si wo immer het gseit / si wet scho nes ching / aber  
villech we si füfedrissgi sig / äs git so viu wo immer  
dervo rede / weisch / wo immer äs ching wei / wo  
jammere / aber bi ihre / si / du!  
chum / äs wird viu gredt / sit i säuber lüge / glouben i de  
angere o nüm aus  
aber weisch wie / si schwanger du  
weiss si de o vo wäm?  
auso chum! / gäu  
was?  
d regine isch nid äso / si wott o mit ihm zämezügle / si  
du / immer das gschnurr vo de grosse stütz / frouebeiz u  
säubstverwürklechung / weisch ja wi si cha schnurre

das isch doch normau / villech het sis gar nid wöue u  
schickt sech jtz äbe dri  
überglücklech isch si / wi we si hät druf gwartet /  
sötsch se gseh / wi tag u nacht  
gsesch / so geits  
aber d regine du  
meinsch würklech i sig hübsch?  
ja / klar  
das seisich du nume / wenn i so dick bi  
ja ja / i weiss / das chiuche im dorf blybt  
i ha scho gseh wie äm röfe sire fründin hesch nache-  
gluegt / u we si redt de überchunsch glänzigi ouge / jede  
seich losisch dere chue ab  
hör doch uf  
i weiss ja / das die hübscher isch aus ie  
la doch dä chabis la si / du gsesch guet us / du gfausch-  
mer / i ha di gärn  
das seisich nume  
i stah uf dir / gopfridstutz / das weisch du doch / i fahre  
ab ufter  
ja uf mim arsch / sägs doch / aber i wott nid nume wäge  
mim arsch gliest würde  
...  
natürlech isch d regine hübscher / aber wenig die  
chleider hät / u zum coiffeur geit si o gäng  
jtz hör doch uf / bitte / bitte / i cha dr doch nid jede tag  
hundert mau säge du sigsch die schönschi frou vor wäut  
aber wenigschtens einisch  
uh  
gang doch wider zur barbara / zu dere chue  
bruchsch doch jtz nid uszflippe u gift sprütze  
gang doch zuere / gang doch / aber we de dere seisich si  
sigi hübsch / de weis i de das gloge hesch  
hörsch jtz uf

: mir seisch das nämlich immer nume so / i weiss es genau  
/ d regine gfaut dr viu besser / du hesch säuber gseit die  
gfau dr besser

: ja genau / u d beatrice dalle gfaut mer o u d meryl streep  
o no grad u d marylin monroe sowiso

: gsesch / gsesch / jtz hesch es grad bewise / so bisch /  
aber du bisch o nid dr Mister Switzerland / das cha dr  
auso säge du / scho nume die brülle

: .....

: gopferdammi! muesch mir jtz di blöde schyssfäueli no  
nie steue?

: beruhig di

: wenn i uf eis bi tschauppet

: i muess dänk dert steue / wös müs het

## A + B

: gäu hie häre chöme mer no meh

: iu

: gäu ds wasser

: mhm

: äs flesst u de chumt immer wider u äs flesst

: uit es flesst

: weisch wie / jtz a chly shit / du weisch wie / das wär de  
dr hammer

: i weiss nid

: mou / dr störsänder i mym gring absteue / einisch a zyt  
lang nume musig

: us dr sfäre gäu

: kes gschnurr

: jtz dänksch wider a mi per / he

: weisch wie? / dä muess dänk jtz üebe

: är muess ja rede morn

du / aber was i dr ha wöue säge / ig han a tante gha / u?  
/ wenn isch die gstorbe? / sicher scho sibe acht jahr /  
aber du / we die isch ines zimmer cho / die isch grad gsy  
/ i weiss nid / wie ne ängu ohni flügu / du we die gredt  
het / das isch so normau gsy / weisch / eifach so  
säubschtverständlech / da hesch genau gwüsst / we sie  
di fragt / du wi geits? / de het si das o wöue wüsse / dere  
hesch du aus chönne säge / die het mi no ärnscht gno /  
das isch nid gsi / du weisch ja / oder / mängisch luegt  
eim öpper a u du merksch sofort / die si uf emene ganz  
angere trip / da gsesch d redli grad dräie / aber bi dere  
tante / da hesch ds gfieu gha / si luegi dr grad zmits i  
chopf ine / aber äbe / si isch gstorbe

## C + D

du / was söü äch das jtz wider / he du / äh

....  
he!

....  
he du!

was isch de o?

los doch / .... / was i ha wöue säge

....  
was nuelisch o dasume?

nüt

suechschi öppis?

ää

was graggisch de därawäg i dä schaft ine?

jtz han is de grad

was?

eh nüt / i sueche numme öppis

werum seisch de....

was hesch wöue säge?

we du nid losisch

i lose ja  
äbe / vori / är het se wider  
wird nid sy  
mou / äbe mou / was hesch du o mit däm gmögg / chum  
doch ändlech mau us däm schaft use  
das isch kes gmögg / gäu  
grünpu / u süsch no minggis  
wo isch er de jtz?  
du / dä cheib het die wider drischagget  
isch er ab?  
dänk wider ga grossi i gring hingere drücke / dr chare  
steit ömu nüm verus  
u äs?  
jtz chum doch ändlech us däm schaft use  
isch äs no dobe? / wart / i chume  
u sy grännet

.....

schnatte u mose het si äm gring / erger aus we si wär  
unger nes outo cho

.....

chunnsch du jtz ändlech mau us däm chaschte use?  
me wird wou no dörfe öppis sueche / oder?  
nimmugopferdammisiech / mir längts jtz de  
jtz tue no so

### B + C + D

auso nei / meitschi  
ja ja  
lue du mau dä chräbu / vo hie bis / vo hie bis / bis  
hingere  
jä heter di / heter di jtz würklech därawäg gchräblet? /  
isch doch nid wahr / zeig / u eifach äso / auso nei  
was het si?  
wenn er se het gchräblet

zeig  
dä cheib  
u du?  
ömu nid eifach äso  
glych  
was wosch de jtz?

## A

de grännisch haut / we de meinsch gränne nützi öppis /  
de grännisch haut / chum / gränn / gränn / gränn / hüh  
gränn / gränn jtz / gränn / gränn doch / äs git nüt  
schönars aus immer das gränn / hüh gränn / gränn doch  
wede meinsch gränne nützi öppis / gränn nume / gränn

## B + C + D

du  
.....  
du / he  
he?  
los! / äh / i wott mit dr rede  
mit mir?  
genau  
über was?  
jtz tue no so  
me darf doch no....  
du weisches genau  
was?  
äbe  
wäge däm muesch jtz ömu nid....  
jtz losisch mer mau zue  
i lose ja  
wüeu  
.....

was i ha wöue säge / so geit das / geit das nid wyter  
jtz chunsch wider uf mi  
bisch öppé nid derbi gsy?  
ou was isch jtz wider los / weisch wie  
wich mer jtz nid us / jtz losisch mau zue  
i lose ja  
wüeu einisch isch gnue  
auso jtz höret uf stürme  
är het ja agfange  
u du bisch natürlech nid derbi gsy / du chasch wider nüt  
derfür  
jtz höret uf  
i ga ja scho / meinsch i heig dr plousch  
nei / jtz red i mit dir / jtz losisch mer mau zue  
....  
gäng dervoloufe  
i lose ja  
du losisch äbe nid / u du bisch natürlech wider nid derbi  
gsy  
auso jtz gan i  
auso die chunnt no uf d wäut / wärdets gseh / das chunnt  
nid guet  
lase doch  
u woħäre geit si / he? / woħäre füdlet si dervo?  
u de är?  
är / är / är  
ihm sejsch nüt  
wenn er immer furt isch  
wenn er ä steu suecht  
im schlüssu hocke ja / grossi i gring hingere drücke  
jtz red nid so  
isch ömu wahr / u i muess morn rede  
....  
wo isch jtz mi sudu wider / hesch du mi sudu verleit?  
**A + X**

Als Leseprobe steht jeweils nur der halbe Text zur Verfügung.

Wenn Sie den vollständigen Text lesen wollen, bestellen Sie diesen zur Ansicht direkt bei uns.

Freundliche Grüsse



teaterverlag elgg in Belp GmbH  
im Bahnhof  
3123 Belp

Tel.: 031 819 42 09  
Fax: 031 819 89 21

E-Mail: [information@theaterverlage.ch](mailto:information@theaterverlage.ch)

Web: [www.theaterverlage.ch](http://www.theaterverlage.ch)